

五言絕句

登太武山

太武聞名久，登臨一愴然。
遠帆停泊處，應是舊山川。

七言絕句

太武山遠眺 其一

岱嶽終南夢久違，登臨無處不思歸。
中原只在江灣外，空見羣鷗自在飛。

其二

浮海西來無限意，還如屈子賦懷沙。
傷心最是登高處，不見長安見落霞。

題《彩色中華名畫輯覽》贈美術系鄭生

世事至今無可論，全真端合隱荒村。
丹青畫出乾元氣，默運天心道自敦。

慰友人落選

纔經危峽又臨灘，自古長嗟行路難。（鮑照有〈行路難〉十八首）
知己相逢姑一醉，功名何害夢中看。

登獅頭山

萬壑千山一徑通，西風瑟瑟半林紅。
心凝渾忘征途遠，回首家鄉夕照中。

秋聲

徒倚西窗夢不成，孤檠冷冷欲三更。
秋風不解離人意，猶自蕭蕭作楚聲。

初客漢城

一去鄉關百緒牽，漢江欲曙未成眠。
韞華臨別雙行淚，滴遍阿爺衾枕邊。
(小女韞華，時方十歲，送行至機場，雙淚闌干)

遊明孝陵

孝陵初到意蕭條，痛史斑斑恨未消。
國祚自隨丞相廢，惟憑石馬認前朝。
(黃宗羲《明夷待訪錄·置相》云：「有明之無善治，自高皇帝廢丞相始也。」)

遊長陵

孝陵謁罷謁長陵，想見亭林當日情。
故國幾番傷往事，陵前依舊柏青青。
(顧炎武詩云：「問君何事三千里，春謁長陵秋孝陵。」)

桂林伏波山

桂林三日雨滂沱，萬里來尋馬伏波。
千古威名何處識？江千一柱立嵯峨。
(伏波山矗立漓江之濱，其狀如柱)

赴洛陽賞牡丹而牡丹落盡矣 其一

萬里飛來爲異姿，滿園空見碧參差。
暮春三月原非晚，國色由來難自持。

其二

聞道姚黃滿洛京，也隨坡老訪瓊英。

兼程萬里非無信，轉恨花無抱柱情。

（蘇東坡與陳述古賞牡丹詩云：「今歲東風巧剪裁，含情只待使君來。對花無信花應恨，直恐明年便不開」。）

律詩

登五指山

山深小徑斜，古木綠交加。聲好尋無跡，香清知有花。

白雲慵出岫，陶令遽思家。回首結廬處，溪邊好種瓜。

小園 家有小苑，山茶與玉桂並開，重葛共扶桑一色，日涉其中，有衡門之思焉。

小園秋已盡，花木尚扶疏，篁竹引高節，藤蘿上碧除。

石榴時一採，山鳥亦相呼，白日南窓下，羣芳美可茹。

紀夢

念載小蘋蹤，渺如出塞鴻。若何江海外，時至夢魂中。

窈窕青衫影，依稀舊日容。相看無一語，惟有淚千重。

金門料羅灣登岸

灘頭百戰血猶鮮，纔下羅灣意肅然。天道未亡存此土，

遺民久盼定三川。卅年生聚還餘淚，一舉出征須靖邊。

迢遞密雲橫岸北，不遮魂夢到幽燕。

太湖談玄 民國 83 年兩岸玄學會議召開於太湖之濱

江南春日好，傾蓋太湖濱。坐看風帆遠，還聆簷鳥親。

玄言追晉宋，逸興出邊垠。不必羲皇上，憑軒足忘身。

謁中山陵

中山陵上雨初晴，松柏蒼蒼照眼明。草木似猶知偉烈，
煙霞長爲護英靈。仁兼湯武除苛政，志紹唐虞開太平。
天道不還年不永，回看臺海淚將傾。

長城

萬峯頂上列雄關，四十年來夢寐間。八達嶺前臨絕谷，
居庸關外峙重山。但憑危嶂一夫守，不教匈奴匹馬還。
撫遍敵樓牆上石，始知邊塞計多艱。

經赤壁

遙想長江四十秋，今看江水拍船頭。九州由此分南北，
兩岸憑誰辨馬牛。赤壁已銷銅雀夢，白雲猶在百花洲。
渝川東下三千里，萬古風雲一棹收。

北邙山

未到洛陽思北邙，梁鴻五歎意堪傷。兩京寥落行看盡，
萬姓劬勞尙未央。稷麥已連天遠近，隴岡不復塚低昂。
撫膺踏遍邙山路，我亦欷歔一斷腸。

次韻鄒順初將軍七十感賦，以爲嵩壽之賀

春風又放杏花紅，歲月忽如江水東。寶劍多年猶熠爍，
詩情漸淡轉清空。邊關賴有將軍計，金馬還存細柳風。
願得河清人益壽，銜杯更慶九州同。

侍 陳師游蘄春

念載從游情益深，中原旅次共長吟。名山勝跡爭供眼，
斷石殘碑亦快心。論學渾忘征路遠，談詩不覺曉寒侵。
蘄州風物多靈秀，展謁前修感不禁。

過汶水訪獅潭弘法院

獅潭木落燕南翔，舊地重來似故鄉。紅瓦數椽臨翠谷，
黃花一徑入禪房。自傷案牘容顏老，坐羨桃源歲月長。
何日還居汶水上，教從摩詰嘯幽篁。

古詩

觀故宮所藏黃子久富春山居圖

富春佳山水，迤邐一卷開。微雲生幽谷，古木插危崖。
曲徑隱復見，雁陣去還來。長汀疏林下，隱約見釣臺。
臺上人已去，空階餘碧苔。嘗聞嚴子陵，幽居以葆真。
既耕亦已種，來釣此江濱。富貴非所慕，一竿足忘貧。
流風被天下，遂使民俗淳。偉哉黃子久，畫此豈無因。
純白相與會，故爾筆有神。

新年

少小多暇豫，那知世事艱。常喜佳節至，遊宴樂無邊。
歲月忽如駛，倏爾雪在顛。形骸不復實，衷懷亦已遷。
佳節無所悅，春來良慨然。嘉會猥居上，銜杯怕問年。
緬思古賢哲，志學久彌堅。明德懸日月，老去何所憐。

賀黃師八十嵩壽

古有大椿者，八千歲爲秋。大年成大知，鯤鵬異蜩鳩。
水擊三千里，搏颺以浮遊。遊乎方之外，翛然忘百憂。
惟所不能忘，人間酒一甌。偶然逢嘉會，高興結綢繆。
十觴都不醉，殷勤猶勸酬。舉座皆驚歎，黃師最風流。

早行

千里有嘉會，終宵夢不成。五更殊未盡，雙睫已先驚。
起視寒窗外，萬家燈火明。巾車即長路，孤月隨人行。
行行未十里，車聲雜鼯聲。東方雖漸白，不見朝日昇。
未知霧色裏，雲山第幾程。

贈西子號西子

西子號者，杭州與無錫間通行火車之名也。一日與朋友自杭州共乘西子號赴蘇州，車上有服務小姐，皆杭州佳麗，明眸皓齒，倩影翩翩。一座驚嘆，呼爲西子，並謂當有詩以記之，因戲爲古風，於蘇州下車時，當面贈之。

朝辭杭城去，登車赴蘇州，車名西子號，行陸如行舟。當窗設虛幌，宛若流蘇帳。下敷紅氍毹，美人步其上。頭綰綠雲鬟，身著碧羅緞。微笑動明眸，一座皆驚嘆。翩然迴身去，明窗忽闔澹。須臾出門楹，素手端茶迎，殷勤待賓客，顧盼如有情。昨在西湖時，曾經見西子；西子如天仙，宛在水中沚。今夕復何夕，天仙在咫尺。諸君雖危坐，皆爲不自持。戲言今一別，且當長相思。願此西子號，永無到站時。我自四十後，無夢亦無詩。對酒思三徑，臨池慕羲之，豈意當此景，心湖起龍螭，原來我亦性情人，不愛軒冕愛西施。人人盡說桂林好，我寧相伴杭州老，古今無限滄桑事，付與煙波一棹了。